


# Kunjen Mark Portions



Portions of the Gospel According to Mark in the Kunjen  
language of Australia

## **Kunjen Mark Portions**

### **Portions of the Gospel According to Mark in the**

### **Kunjen language of Australia**

copyright © 1967 Wycliffe Bible Translators Australia

Language: Guguminjen (Kunjen)

Dialect: Oykangand

Translation by: Bruce and Elaine Sommer

Contributor: Mrs. G. Cecil, Mrs. E. Henry and Mrs. K. Major

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-08-26

---

PDF generated using Haiola and XeLaTeX on 11 Nov 2022 from source files dated 27 Aug 2020

df9fb619-4c61-57ce-898b-682b09b8282c

## Contents

Mark . . . . . 1

## INGIN MARK-ANG (Selections from Mark)

This is a preliminary translation of some passages from Mark's gospel into the Kunjen (Oykangand) Dialect of Cape York Peninsular. English translations of the Nestlé Greek (Revised) Text were used as the basis. The translators acknowledge, the help of the Kunjen people in the preparation of this material and in particular Mrs. G. Cecil, Mrs. E. Henry and Mrs. K. Major. (Bruce and Elaine Sommer - translators.)

Mark 2:1-12  
 Mark 5:35-43 \*  
 Mark 6:32-56  
 Mark 14:3—16:8

### 2

<sup>1-12</sup> Errk ilimbam elkel il uwam, Capernaum-g elkel il. Ilimb edn elben errbel, "Abm angg elkel il, unggul orchen-g in il." Ilimb abm elgor orrnjel edn, errk urrgarr edn kungar ew andand igag inann igunm edn, erray adnim errnenn edn. Il ednangan ingin udnam elbenm il ednangan. Ilimb edn abm errab adel, abm udnbar ilg, adoriy alnganm edn. Anganjab ulgal adenn edn, abm elgoriy errk urrgarr. Ilimb edn kungar adnim artirr. Ilimb edn errkw

adnim iyarr algal ingun abm alkalg ernerrnennamag. Ilimb edn urunnd alnggan ambarr edn ingun uk ador ilg abm udnbar itiy. Ilimb il ednangan anen ewal abm edn ingun ondonganm errgel il ingun abm udnbarag. "Elnkelnlg! Ay inun ugngal arrk anggunyan inin udnam ambarr."

Abm edn abm *scribes* edn ininann adnduriy aliyan errbenn edn abmban, "Abm il galanggannd aneg errg? Aba orrm il, abm ibangarr alkarrnj errk anggunyan udnam ambarr! Abm onggom il odnnd ewerrnyel ambaniyerr orrnjen ingun ibangarr alkalg!" Abm il ednangan an uw aliyanm abm edn anen adnduriy allyan errbenn edn abmban. Errgel il ednangan: "Abm urr aneg adnduriy allyan errb abmban? Abm ilimb ay arrin erreg ingun abm udnbarag? Galanggannd, 'Errk anggunyan inin ugngal an udnam ambarr ay.' Ilimb ay galanggannd erreg ay ingun, 'Artil inang! Agarr adamb atal inin, puy igul!' ingun kawun egnggal arrfinag ilimb onggol antenn oyol ambengan ay." Orren idumbag abm elgoriy elkarr il, ilimb kawun egnggal arrfirr il ingin.

Itodam ilimb idnnan ewann errbel il ijam akarkarrel, olbong awiy arrmel ingin. Ilimb ingun Jesusorol ukirr. "Abm angg adun anen

\* **O:** Original book says Mark 5:21-43 on contents page but this does not match the text

anbarel, abmal adun onggol uw arrfurr. Orol angg ambey ay.”

Ilimb il aykel, errnel il, errgel il abm elgorag item: “Kawun aden annul arrfurr?”

Ilimb abm omoriy ingin errgel ingun, “Abm elgor angg ayin ew inang igigunam? Abm aneg ampayin inang, ‘abm anennd ambarr inun, annul uw arrfiyenn inun?’”

Ilimb il el anggan anggannd igurr il, abm ewannag il, abm annul arrfurr ingun. Ilimb il aba errmerriy item aliyen errbel, idnnan oyol ambel il, igurr il ingun, ilimb ognggegamennd errmbel il ingun ugngg ewag. Irchirrchil il ugnggann, ilimb il ingin ingin elberr il. Jesus errgel il ingun, “Onpor! Puy igul inang. Abm ugngal inang an. Abm ay inun idnnan etetal ambarr, abm inang adun anen aliyam abm idnnan iyaliyamag.”

## 5

35-43 Ilimb abm adnjiy onongg adenn alol il uw ilg. Kungar errk abm adnjiyam itolng ingin adel il. “Abm alkal item int alnggan inang inun.”

## 6

32-44 Olbonnd igurr edn, elor, errk abm aremamag, abm elgoriy ewal edn igunam ednangan, abm edn elemag ednangan, ilimb edn ognggogngg idnjirr ognggam

idannag. Inchim elgoram itomiy edadelag idnjirr edn. Ilimb anen il olbonngand artirr, abm elgor ewal, ilimb il arrmirr il ednangan abm omoriy aremag. Ilimb ingin udnam elbenm il ednangan. Ugng anan alnggarr, ilimb edn abm omoriy ingin igurr edn ingun, errgel ingun: “Errk angg abm aremarr ambungan, errk ulbun an elkel. Karrey ela ednangan. Ak igun edn egng afanag, egng ijanag awiy edn.”

Ilimb il ednangan errgel, “Egng onggom ar uw urr ednangan egng ijanag.”

“Egng anganj onggom! Ilimb \$200 ayin uwag anndan egng afanag anndan, ilimb abm elgorag angg uwannag awiy, egng ijanag?”

“Egng ilimb arrinjag urr alnganganm? Egng ecb ayin ewann al!” Egng ewannam item, ilimb elkel edn ingun, “Egng scone onggom erraberrab, uy angg ujir.”

Ilimb ednangan abm alkarnj elberr ategerregarr injanganj ukantanamennd inann igun edn. Ilimb afarr il egng uy errbaniy, ilimb el adniy errk angar ewann errnel il, ilimb egng item iyarrwiyyarr il ednangan ilimb ub ubmarr il, abm omoriy ingin undamag uwal il, abmag uwann igunag edn ednangan. Ijarr edn, edor ambel edn. Ilimb abm omoriy ingin undamarr egng entental uy elgay errbaniy ogngon ambarr.

Abmbin errabiy ewidnn-dannd amb. Abm elgor idnnannd ijarr edn egng itom, abm arrkannd 5,000.

45-52 Agagwin il ednangan abm alkarnj elberr abm omoriy ingin, "Urr olbonnd ogngg igul, og abmb, anb awandag, *Bethsaida-g* igul."

Ilimb abm erray errkig err elarr il ednangan. Ilimb il ednangan abm omoriy ingin ugnggirr, alkal abm ibangarr ingun undamag ergennag il ognggegamenn errmbennag igurr il adniy olwon-g. Errk anen ulbun ambel, uk olbon abm omoriy ingin undamarr og ifimennd errnenn ambarr, ilimb abm alkal elor errk anbamennd errnenn il. Ilimb ewal il ednangan orrfoyerr ikinm ambanm ednangan, ilimb anngal arem ambel edn, uk olbon ignggigngginam. Ilimb errk ugngugngal egnggenniyerr, adel il ednangan, il abm alkal, odnyol adnim igumm il. Abm idnnan il ednangan udarrw iguyenn, ilimb abm omoriy ingun undamarr ewal edn ingun, odnyornj igigunam, ilimb ambel edn ar oroleb igum il, ilimb alkarr edn, ugnggann edn. Ilimb errgel il ednangan, "Ar ugnggay urr! Abm urr ar ekelekey adun? Abm onggom ay igiun."

Ilimb artirr il ednangan olbon-g adniy, itodam ilimb orrfoy edndelag arrmel. Ilimb edn abm omoriy ingin orol alnggebalnggel, il-

imb edn abm alkarnj egng errab itod anen abm elgor edor ambarr il. Abm edn ingun anganj aliyanm, adndur odong ambenn edn.

53-56 Ilimb edn anen orrog alnggarr, ilimb edn uk olbon adniy elebag ignggirr, errk ukal *Gennesaret*. Ilimb olbonngand anen artirr edn, abm alkalg ingun abm elgor elemag ambel edn. Ilimb edn idnjirr eremperemp udnal, abm adnjilg elgeniy olon agarr ilg algnganm ingun abm alkalg, anen aliyanm edn errk unggulg igunamag. Ilimb il anen adenn, abm adnjilg err kungar andand ojojenm edn errk umbuchi awiy. Ilimb edn ingun abm adnjilg errgenn, "Andan inun kawun egnggal inin ak arrfin, idnnan oyol ambennag anndan." Ilimb edn arrfinam anen oyol ambenn amb edn.

## 14

3-9 Errk ukal *Bethany* tod udnal il abm alkal. Inchimiyy ingin undamarr *Simon-ang* udnann il. *Simon* ijam arrmel il, ijam ukal *leprosy*. Jesus egng ilgag ijanm ul, ilimb abm aber adel ulangan, uk olom alaminjinjal owol udnam udnam alnggarr il ulangan. Uk olom alaminjinjal ukal nard alnggarr il, uk ilbmb *money* amayerr afanam il. Ew erarr il, ega-mennd ontagirr il ingun.

Edn errayennd ininannam edn, errgenn amban errbel edn ingun. "Aneg arr

ambarr il ononggiy? Ambul angg *money* atat afayenn itomiy ambul, uk olom alaminjinjal itolg \$300 afayenn ambul. Ilimb abmbangan gandag ednangan, *money* ew aremag ednangan, ambul uwayenn ednangan.” Ilimb edn elberr edn ingun, abm aber item. Adnant alwur oyel edn ingun.

*Jesus* errgel il ednangan, “Unggil urr! enenolg elben errb urr! Abm anengand alwur artartin urr? Udnam ambarr il adun. Edn *money* aremarr igigun edn, urranganjerr titod amb igigun edn. Eladnarrang igigun edn. Urr *money* ilg urr, urr uwag ednangan, *money* aremag uw urr ednangan! Ay onggod aremag inag. Ay angg err uw igungan ay. Abm aber onggom angg adel il, uk olom alaminjinjal owel udnam ilg adenn ambarr il adun, uwal il adun. Abm unggal arrcharr ambengan ay, uk olom alaminjinjal ogngg ontagirr il adun, abm owel udnam artin ay. Abm ay idnnan elben urrangan ay; abm elgoriy iyannd ingin onggom aliyanan edn, edn iyannd aliyanan edn ingun abm aber angg, errk ednang undamam aliyanan edn. Udnam afarr il adun.”

Ilimb *Judas Iscariot* il abm omoriy *Jesus*-ing ingang igurr ednangan il, *Priests* atatag igurr ednangan il.

Errgel il, “Iyannd arrfingan ay ingun *Jesus*, ilimb uwangan ay urrangan. Puy urr atuwil!” *Priests* atat

edn aliyarr edn ingun *Judas*, ilimb ekelekel edn ingun, *money* adndurag ikirr edn ingun. Ilimb eliyarriyanm il ingun.

12-16 Errk egngenniy ilimb egng arronggom ijanm edn. Inn arrirr edn, inn *sheep* amboch arrirr edn, inn arronggoraag. Ilimb abm omoriy ingin errgel edn ingun: “Abm arrin igug anndan, egng arronggom archenag?”

Ilimb abm ujir elarr il. Errgel il ulangan, “Kungar elgor it ugnggarr errn. Puy ubal ugnggar. Abm algam onoggab item ewangan ubal, og algngalganganam ewangan ubal. Orren arrkarkkil ubal ingun. Inchim onoggabiyl elkengan il. Itolg elkal ubal, abm ukirringg ukil ubal ingun. Galanggannnd errg ubal ingun: ‘*Jesus* il elarr alinnan il, abm alinn ampayinag inun alinn, errk ayin anndangan?’ Errk abm inannag anndan, errk ebmbebmbolrnj, inndod egng ijanag anndan?’ Ilimb errk adniy eleg ambangan.”

22-25 Edn egng ijijanm edn, egng *damper* afarr *Jesus* il, ibangarr alkalg ampayirr il: “Angg ayin iyarrwiyal anndangan.” Ilimb egng item ubmarrubmarr il, abm omoriy ingin undamag uwal il ednangan. Errgel il ednangan, “Angg afal urr, idnnan aden onggom.”

Ilimb egng orch afarr il, onderr ibangarrag uw errgel

il, uwal il ednangan. Abm elgoriy amb ijarr edn. Errgel ednangan, "Olbong angg aden. Abm elgorag ontagan ay urrangan, ulfinam. Olbong aden ilgag ambey ambung abm elgor anggiy ibanggarr alkalg. Idnnan elben ay urrangan, egng orch onggod ar uw ijangsan ay, ilimb errk alkalng undamarr adniyerr onderr uw ijan alongan ay."

26-31 Ilimb odnjen *hymn* errgel edn. Olwon-g igurr edn adniy, olwon ukal *Olives*. Errk ukuy odn-genm edn adniy, uk ar olbmbannd odn-gen.

Jesus errgel il ednangan, "Ay iyannd urraden ambanagan urrangan. Urr elor amb ugnnggingan adun urr. Edn anamokom olfernj ar alnggur iyanm edn adun. Galanggannd errgenn edn adun: 'Alkarnj abm angg olon adenn ambanag il ambungan. Abm item il urrangan ar *sheep* atuwinag il urrangan. Ilimb ibanggarr alkarnj odnndorag abm arringan ingun. Abm ars*sheep* arrngal ambengan urr.' Ay idnyur ambennag ay ilimb. Ibanggarr alkarnj arrmangannd artinag adun il, ilimb ifanny elkengan ay, *Galilee* itolg adengan ay ogngg, orren."

43-50 Galanggannd Jesus uw errgennam, abm elgor item edn olon igunag edn. Judas-an idndamag igunm edn olon. Abm omoriy abmbannd ingang Jesus-ang, abm itod amb elbenm il ingun Jesus.

Priests amay edn, scribes edn, abm ukirrnnngg edn abm elgor awar it elarr edn ednangan. Ar uyulgng ilg elarr edn ednangan, ulgnggul errbaniy. UWam adel ag edn, *Judas* ogngg abm elgorag errgel il ednangan, "Puy ambul! Ay iyannd uw iyarrwiyanag ay urrangan. Abm algam ononggab ew arrchangan ay ingun. Abm item il! Arrfil urr ingun! Iyarrwiyaniy algngal urr ingun!" *Judas*-an olon adel il, algal amb igurr il ingun *Jesus*. Errgel il, "Master!" Ilimb ew arrcharr il ingun. Ilimb abm elgoriy atatan-g arrfrr edn ingun *Jesus*. Abm omoriy ononggab *Jesus*-ang ingang ar uyulgng ignggir il, abm ononggab adndur ekarr il arurrf. Abm item amb il *Priest* amayang.

Jesus errgel ednangan, "Ar uyulgng ilg, aneg adel urr adun ulgnggul ilg awiy, abm arrfinag al adun urr? Abm ay alwur obmbay anganj ay! Abm ay itod amb inann ay, *Temple*-iy inann ay urranganjerr. Ar ogngg arrfinm adun urr?" Abm omoriy ingang undamarr ugnnggir edn ingun *Jesus*-ang. Ew orrchel edn.

51-52 Abm elngkelngg ononggabiy arrkarrkinm il ingun.

60-61 Ilimb *priest* amay ononggiy algnggay errnenn il ednangan. Jesus-ag errgel il ingun, "Uw innday errgerrg inang? Abm inun angg elbelben inun, inang

arag errg inang?" Uw arem errnenn il. Uw anganj uw errgel il.

62-64 Ilimb *priest* amay il onderr uw errgel il ingun: "Christ ayin inang? Abm inang atat alkalng ayin?" *Jesus* errgel il ednangan, "Iyang ay. Abm ay angg olangarr amay urrang ay. Iyannd ew adun urr, alkal ilg inannag al ay, iybarang gal orrm atuwin alinn urangan. Abm orrchar ilg elken-gan ay olon." *Priest* amay-err kawun egidurr il ingin undam, adnant alwuriy egidurr il, alwur amay ilg. Abm onggolg inannam ednangan, errgel il ednangan, "Akudnag ambul! Arrmel ambul! Ayin urr aliyarr urr ingun? Abm uw elemag ednangan err elal ednangan. Abm item il ibangarr alkalg orrnjen errb il. Abm arrin errg urr?" Ilimb abm ukirrnga edn oyol il ugnggay ambel edn errgel, "Ak ulfin il."

65 Abm errayennd edn, ewednjemennd idunm edn ingun *Jesus*. El onpor errnenn ambanm edn ingun, uyamiy arrinm edn ingun. Ilimb errgel edn ingun, "Elbel inang! Abm annul arrirr inun?" Abm arrchunnd err algngarr edn ingun, uyam ifimennd arrinm edn ingun.

## 15

1-5 Arrcharr ugng art-namiy awand, *priests* amay edn, *scribes* edn, abm ukirrnga edn, abm adnjirradnjiy

edn ogngonalngngel edn, errgenn amban errbennag. Atarr edn ingun, *Jesus* odnjemb atarr edn ingun, ilimb err algngarr edn ingun. Ilimb uyamag ikirr edn ingun *Pilate*-ag. Pilate errgel il ingun Jesus: "Abm inang onggom abm atat Jews ingang ey?" Ilimb *Jesus* il errgel, "Iyang ay." *Priest* atat edn uw anggunyan elgorag edndan amban errbenn edn ingun *Jesus*. Pilate uw errgel ingun *Jesus*, "Abm anengand inang uw anganj errg inang? Abm onggod edn inun uw elgorag edndan amban edn inun." Ilimb uw anganj uw errgel il *Jesus*.

6-15 *Pilate* il orol alnggeb alnggel il.

Ilimb abm elgor adel edn ingun *Pilate*-an, ilimb ampayirr edn ingun, "Abm odnjemb atanam item, olon ugnggil anndangan inang!" *Pilate* il abm ononggab eranm il ingun abmag egng erronggom anen ijanm edn errayennd. Abm elgor edn odnjemb arrfinam, abm elelmb arrarinam. Abm ononggab ukal *Barabbas* abm arrkenniy odundorag arrirr il. *Pilate* il ampayirr il ednangan, "Abm ilimb ann uwag ay urrangan? Abm ol ilimb king amay onggom elag ay urrangan, ey?"

*Pilate* il an uw il aliyan ednangan, abm priests edn ingun *Jesus*-an el aguriy am-benn. Uyamag uwal edn ingun *Pilate*-an.

*Priest* amayerr edn ajaiyanm edn ednangan abm elgor, ilimb abm elgoriy alkarr edn, “onongg item olon eral inang anndangan, abm ukal *Barabbas.*”

Pilate il errgel ednangan, “Abm ilimb onggom arrin ambag ay ingun? Abm ukal angg Jesus elben urr ingun?”

Ilimb abm elgor alkarr edn, “Karrey arril ingun! Uk adoriy ak ulfin il adniy!” *Pilate* il errgel ednangan, “Ilimb errk anen ukirr il?” Ilimb edn onderr iyaranggal alkanm: “Karrey arril ingun! Uk adoriy ak ulfin il adniy!”

16-20 Ilimb abm arrchunnd arnyarnj arrnyinm edn ingun *Jesus*. Ilimb edn arrchunnd algnganm ingun *Jesus*, kungar amayag urunnd, kungar *Pilate*-ang undamag. Ilimb abm arrchun onderr olon udndarr edn. Kawun olbon antarr edn ingun, ar uk ebal amay iyarr edn ingun, uk arrb ilg aykenn ambanam. Ilimb adnim egamennd ugnggirr edn ingun. Ilimb ewerrnyel ambanm edn ingun, “Abm atat inang, *King of Jews* inang, ey?” Uk olbbomennd arrinm edn ingun, errayennd ewednjemennd idunm edn ingun, erray edn ingun ognggagamennd errmbenn, orrmodnnd angal ambanm ewerrnyel ambanm edn ingun. Ilimb itodam arrmel edn, kawun erarr ingun undam. Ilimb kawun ognggam item amb elkan ambarr edn ingin,

ilimb adnim artin ambarr edn ingun, algngarr edn ingun itodam, urunnd uk adoriy errnenn ambanag edn ingun.

21 *Simon* il abm errk *Cyrene*-am igunm, errk odndonggam ugnal uw adel il, ilimb errjarr edn ingun. Abm il idnnan udarrw uw iguyenn. (Abm il andangarr ujur ilg ukal ulang *Alexander, Rufus.*) Abm arrchunnd ajajianm edn ingun uk ador ingin algnganag.

22-24 Ilimb Itodam, arrchunnd algngarr edn ingun awar, errk ukal *Golgotha*, errk abm odnndor elgayerr. Ilimb egng orch ilbmb uwayenn edn ingun *myrrh* errbaniy, ilimb il anganj errgel. Ilimb uk adoriy urdndan ambarr edn ingun. Agarr ingin uwann uwann errbel edn, ukelof ilg iyalmenn edn, agarr ingun undamag erray err algnganag edn.

25-27 Ugng etetal ambenniyerr, arrirr edn ingun, uk adoriy arrodarr edn ingun. Ilimb edn ukal iyarr edn adniyerr, “Abm onggom il abm atat *Jews*-ing.” Abm algam ujur arrirr edn ingunjerr. Ilimb anolongiy errnenn ambarr edn ulangan, ador ilg. Onongg ekomi, onongg alagi errnenn ambarr edn ulangan.

29-32 Abm erray awinnd orrog igunm ew egnggilgerr ambanm edn ingun, errgenn edn ingun, “Abm errgenn inang anndangan, kungar

amay errmbenn ambanag, ilimb ernnenn ambangan inang elwan errabiy, abm unggal karrey adoram alnggal inang adnim.”

*Priest* amayerr scribes erbaniy edn idndamag ew-errnyel ambanm edn ingun *Jesus*. Galanggannd errgenn amban errbenn edn, “Abm innday erray iyarrwiyanm il, ey? Ugngal abmban il ar iyarrwiyan errb? *King of Israel* uk adoram arag alnggan il adnim, ilimb ambul ingun ewannag awiy, ilimb ambul ingun aliyiyanaq ayarral amb errgenn il, abm il abm amay.” Abm ujir item awiy ul ednangan idndamag anen arrirr, orrnjenm ul ingun abm alkalg.

33-39 Ilimb errk ulbun alnggarr ednangan, ugng adnigam, ugngubag. Ilimb il *Jesus* uw amandarr errgel il, “Eloi Eloi lama sabachthani?” Errgenn il, “Ijang Ijang, abm anegal ugnggirr inang adun?” Abm errayennd errnerrnen-namiy aliyarr edn ingun, errgennam. Ilimb errgel edn, “Aliyal ambul ingun! *Elijah*-an alkan il ingun.” Ilimb ononggab idnjirr il, eeng og elbmbelbmben afarr il. Elkenn ambarr il olon ar uk aynyaynyerr. Ilimb uk utarnj uwal il ingun adniy. “Ech ar andandar! *Elijah* onggolenn adengan il, abm alnggan ambanag ingun adnim.”

Ilimb itodam *Jesus* amandar alkarr il, orol engkar

amay ikirr il, ilimb ulfир il. Ilimb ibangarr alkarnj il uk *curtain* egidurr, kungar *temple*-iy umag. Egalkal egidurr il urunnd.

Abm arrchun *boss* il el adniy ernnenn ingun abm alkalg, ilimb ewal il ingun, orol engkar enolg ikirr il, ulfinam. Ilimb errgel il, “Ayaral amb, idnnan idnnan il, abm onggom arrngg ibangarr alkalg amayang.”

40-41 Abm onporramp onggg anen igumm edn ingunjurr, errk *Galilee* itod, egng awiy arrchenm edn ingun, itod uw errnenn edn il adniy ikinm edn ingun, ewann edn. *Mary Magdalene*, *Mary* (amangarr abm elngkelnggang ukal *James*, *Joseph* ulang) *Salome*, abm onporramp erray errbaniy igurr edn olon ingunjerr *Jerusalem*-ag, ilimb ewal edn ingun ulfinam.

42-47 Ilimb il abm alkal arrcharr ambel, “Errk *preparation*”, ilimb itodam sabbath atuwirr edn. Ilimb Joseph abm *Arimathea*-m igurr il *Pilate*-an ampeylnag ingun. Abm il ugnggannudnyay ilimb il angirranginiy igurr il. Abm il abm eg udnam, abm adnijy *councilor* il, ibangarr alkalg idann il ingun errk udnam ambanag ingin. Errgel il ingun *Pilate*-an, “Inang abm umalangg ayin uwag inang adun item, *Jesus*?” Ilimb il *Pilate* orol alnggebalnggel abm alkal il ugnal ulfир. Ilimb il ingun abm arrchun amay ud-

ndarr, ampayirr il ingun,  
“Abm ayin ulfирр il?”

“Iyang. Ulfирр.”

Ilimb *Pilate* il abm umalangg uwal il ingun, *Joseph-an. Joseph* kalak arrfar alnganm il, ilimb il uk adoram alnggan ambarr il ingun adnim. Ilimb uwurrag ambarr edn ingun. Ugunbly errkew amay adndand errmber errk ew anggayerr ugnggirr edn ingun. Ilimb edn adndand amay ugnggirr edn errk ewamennd. *Mary Magdalene*, onongg il *Mary* (amangarr *Joseph*-ang) ewann ul ednangun abm ingun abm alkal ugngginam.

## 16

<sup>1-8</sup> *Sabbath* anen arrmel edn *Mary Magdalene*, *Salome*, *Mary* (amangarr *James*-ang) uk ilbmb alnganm edn ingun, idnnannd uninag ingun *Jesus*. Arrcharr ugng el artinamiy, ugunbag igum edn awar. Awinnd errgann amban errbel edn, “Adndand abm annul ambungan err amug? Adndand amay idnnan il.”

El ikirr edn adniy, errk ew anggay ewal edn, adndand ogngg amurr abm annulenn. Anen ulgal adel edn, ilimb abm elngkelngg ewal edn ininannam. Alagiy inann il kawun arrfar ilg. Ilimb onporramp edn orol alnggebalnggel.

Abm elngkelngg item errgel il ednangan, “Abm urr aneg ugnggay? Ay urrangan an uw aliyan, abm urr ingun *Jesus* agnggan. Odnndorag arriirr edn ingun, uk adoriy, abm ilimb il onggom anganj. Errk ayin ew urr ingin, abm anen ugnggirr edn ingun? Abm idnyur ambel il, artirr il onggodam. Puy elk urr, ingin ilg! Abm omoriy ingun undamag ingin elbel, *Peter-an* awiy. Aba il urrangan ogngg igungan errk ukal inndod onggomag, errk *Galilee*, ilimb urr orren igul. Itod ew urr ingun iyannd ogngg anen elbenm il urrangan.” Ugngganny artirr edn errk ewangand itemiy, idnjin artirr edn. Irrchirrchip edn. Ilimb edn ingin abm errayag anganj elberr, abm ugngganiyerr edn.